



Minggu, 11 Juli 2021
Ogen: Esekiel 5:11-17



Pengajaran Tuhan



Werbage-bage curak pengajaren si rusur si aloken bas kegeluhenta. Biasana adi pengajaren e nambahi pemeteha, lit pengajaren e mpersingeti kita gelah ulanai si ulihi perbahanennta si salah, janah lit pengajaren e alu curak ukumen. Arah nehken ukumen e sura-sura gelah siniajarken e robah.

Renungenta sekali enda pengajaren Tuhan nandangi bangsaNa, erkiteken bangsa e enggo encemarken rumah Tuhan alu kerina kejahatan ras perbahanen si ciga ate Tuhan. Bangsa e la ngergaken perbahanen Tuhan si mbelin man bana, ipilihna ganagana si deban lako isembah, janah itundalkenna Tuhan. Pengajaren Tuhan e curakna penghukumen, eme alu ngeruntuhkan bangsa e, sepertelu penduduk Israel pagi mate, sepertelu itampil pedang, janah sepertelu nari ikerapken Tuhan gelah ibabaken angin, jenari ielis-elis Tuhan alu pedang.

Tujun pengajaren e eme gelah sisa bangsa Israel si la ikut mate entah kernep, ngeteh uga sangatna rawa ras pernebeh ate Tuhan. Emaka itandai ras ieteh bangsa Israel maka Tuhan kap Dibata si nggeluh ras erdolat. Adi enggo tangkas man bana ise Dibata e enggo banci ia muat keputusan, ise si man sembahen. Tujun si peduaken, kerina bangsa-bangsa i sekelewet Israel pe gentar janah jadi pertenget man bana. Ciga ate bangsa si deban nandangi Israel emaka iuru-uruna. Antusenna, bangsa si deban pe ipake Tuhan lako nehken pengajaren man Israel amin pe alu cara nguru-ngurui ia. Sura-sura Tuhan gelah lit dalam Israel jera. Lit pepatah, sekali dayung dua pulau terlampaui, bageme Dibata i bas nehken pengajarenNa, la terjeng bangsaNa si ngidah kuasa ras kedolatenNa tapi bangsa i sekelewet Israel pe ngidahsa. Dungna kalak e pe robah, ras mandang man Israel erkiteken perbahanenna man Dibata.

Tuhu perlu kal pengajaren Tuhan e seh man banta, gelah si tandai banta, si eteh kelemahen ras kekurangenta janah si eteh pekenasa, ras mpekena kesalahen temanta.